



ՀԱՅԱՍՏԱՆԻ ՀԱՆՐԱՊԵՏՈՒԹՅԱՆ  
ԳՆՈՒՄՆԵՐԻ ՀԵՏ ԿԱՊՎԱԾ ԲՈՂՈՔՆԵՐ  
ՔՆՆՈՂ ԱՆՁ

ք. Երևան

11.05.2018թ.

Ո Ր Ո Շ ՈՒ Մ

ՀՀ գնումների հետ կապված բողոքներ

քննող անձի

թիվ ՍՑ-ԷՍ-2018/38

ՀՀ գնումների հետ կապված բողոքներ քննող անձը (այսուհետ՝ նաև Բողոքներ քննող անձ)՝ ուսումնասիրելով Հայաստանի Հանրապետության ֆինանսների նախարարության կողմից 11.04.2017թ. թիվ 03/26-3/6765-18 գրությամբ «Էլմարկետ» ՍՊԸ-ին (ՀՎՀՀ 00112776) (այսուհետ՝ նաև Ընկերություն) գնումների գործընթացին մասնակցելու իրավունք չունեցող մասնակիցների ցուցակում ներառելու նպատակով նախաձեռնված ընթացակարգով ներկայացված հիմքերը, պարզեց հետևյալը.

**1. ՀՀ ֆինանսների նախարարության ներկայացրած փաստերը և պահանջը.**

ՀՀ ֆինանսների նախարարությունը, «Էլեկտրոնային կառավարման ենթակառուցվածքների ներդրման գրասենյակ» ՓԲԸ-ի 06.04.2018թ. թիվ 074Ա գրության հիման վրա, 11.04.2018թ. «Էլմարկետ» ՍՊԸ-ին գնումների գործընթացին մասնակցելու իրավունք չունեցող մասնակիցների ցուցակում ներառելու նպատակով նախաձեռնել է ընթացակարգ՝ Բողոքներ քննող անձին ներկայացնելով համապատասխան հիմքեր:

**2. «Էլեկտրոնային կառավարման ենթակառուցվածքների ներդրման գրասենյակ» ՓԲԸ-ի ներկայացրած փաստարկները և դիրքորոշումը.**

«Էլեկտրոնային կառավարման ենթակառուցվածքների ներդրման գրասենյակ» ՓԲԸ-ն 06.04.2018թ. թիվ 074Ա գրությամբ դիմել է ՀՀ ֆինանսների նախարարությանը՝ հայտնելով հետևյալը.

«Համաձայն «Թվային Հայաստան» հիմնադրամի և «ԷԿԵՆԳ» ՓԲԸ-ի միջև 25.01.2018թ. կնքված ԹՀՀ-ՄԱԾՁԲ-18/1 ծածկագրով ծառայությունների մատուցման պայմանագրի, «ԷԿԵՆԳ» ՓԲԸ-ն իրականացնում է «Թվային Հայաստան» հիմնադրամի «Գնումների մասին» ՀՀ օրենքով նախատեսված գնումների համակարգողի ծառայություններ:

Միաժամանակ տեղեկացնում ենք, որ 10.02.2018թ. «Թվային Հայաստան» հիմնադրամի անունից գնանշման հարցման ընթացակարգով (այսուհետ՝ Ընթացակարգ) հայտարարվել է ԹՀՀ-ԳՀԱՊՁԲ-18/2 ծածկագրով համակարգչային սարքավորումների ձեռքբերման մրցույթ:

Չափաբաժին 1-ի համար առաջին տեղ զբաղեցրած մասնակից է ճանաչվել «Էլմարկետ» ՍՊԸ-ն և վերջինիս առաջարկվել է հրավերով սահմանված ժամկետում ներկայացնել որակավորման չափանիշները հավաստող փաստաթղթեր:

21.01.2018թ. վերոնշյալ չափաբաժնի համար «Էլմարկետ» ՍՊԸ-ն armeps համակարգի միջոցով ծանուցվել է և նրան առաջարկվել է ծանուցումն ուղարկելու օրվանից երեք աշխատանքային օրվա ընթացքում էլեկտրոնային փոստի միջոցով ներկայացնել որակավորման չափանիշները հիմնավորող՝ ԹՀՀ-ՄԱԾՁԲ-18/1 ծածկագրով հրավերի 2-րդ մասի 3-րդ բաժնով նախատեսված փաստաթղթերը:

Սակայն «Էլմարկետ» ՍՊԸ-ն սահմանված ժամկետում չի ներկայացրել հրավերով պահանջվող որակավորումը հավաստող փաստաթղթերը, որի պատճառով վերջինիս հայտը մերժվել է:»:

Ընթացակարգի քննության նպատակով տեղի ունեցած նիստերին մասնակցում էր «Էլեկտրոնային կառավարման ենթակառուցվածքների ներդրման գրասենյակ» ՓԲԸ-ի ներկայացուցիչ Արթուր Բադալյանը:

### **3. «Էլմարկետ» ՍՊԸ-ի ներկայացրած փաստարկները և դիրքորոշումը.**



Բողոքներ քննող անձը դիմել է «Էլմարկետ» ՍՊԸ-ին՝ հնարավորություն տալով ՀՀ ֆինանսների նախարարության կողմից 11.04.2017թ. թիվ 03/26-3/6765-18 գրությամբ նախաձեռնված ընթացակարգի վերաբերյալ ներկայացնել Ընկերության դիրքորոշումը, սակայն վերջինիս կողմից որևէ դիրքորոշում չի ներկայացվել:

Ընթացակարգի քննության նպատակով տեղի ունեցած նիստերին մասնակցում էր «Էլմարկետ» ՍՊԸ-ի տնօրեն Տիգրան Հարությունյանը:

**4. ՍՑ-ԷՍ-2018/38 ընթացակարգի քննության համար էական նշանակություն ունեցող փաստերը, Բողոքներ քննող անձի հիմնավորումները և եզրահանգումը.**

Բողոքներ քննող անձն ուսումնասիրել է ՀՀ ֆինանսների նախարարության 11.04.2017թ. թիվ 03/26-3/6765-18 գրությունը, «Էլեկտրոնային կառավարման ենթակառուցվածքների ներդրման գրասենյակ» ՓԲԸ-ի 06.04.2018թ. թիվ 074Ա գրությունը և կից փաստաթղթերը, ԹՀՀ-ԳՀԱՊՁԲ-18/2 ծածկագրով գնանշման հարցման ընթացակարգի հրավերը (այսուհետ՝ նաև Հրավեր), ԹՀՀ-ԳՀԱՊՁԲ-18/2 ծածկագրով գնանշման հարցման ընթացակարգի գնահատող հանձնաժողովի (այսուհետ՝ Հանձնաժողով) 19.02.2018թ. ժամը 09:00 նիստի թիվ 2 և 27.02.2018թ. ժամը 10:00 նիստի թիվ 3 արձանագրությունները, «Գլոբալ Ար» ՍՊԸ-ի կողմից 26.02.2018թ. «Էլմարկետ» ՍՊԸ-ին ուղղված գրությունը, «Էլմարկետ» ՍՊԸ-ի և «Գլոբալ Ար» ՍՊԸ-ի միջև 13.01.2017թ. կնքված պայմանագիրը, Ընկերության կողմից ներկայացված հայտի պատճենը.

«ԹՎԱՅԻՆ ՀԱՅԱՍՏԱՆ» հիմնադրամի կարիքների համար՝ համակարգչային սարքավորումների ձեռքբերման նպատակով կազմակերպված ԹՀՀ-ԳՀԱՊՁԲ-18/2 ծածկագրով գնանշման հարցման ընթացակարգին մասնակցության հայտ է ներկայացրել «ՎԱՆԴԻՍ» ՍՊԸ-ն:

Ընկերությունը Ընթացակարգին մասնակցելու նպատակով ներկայացված հայտի՝

- N3 հավելվածով՝ ընթացակարգին մասնակցելու նպատակով հրավերով սահմանված որակավորման չափանիշների պահանջներին բավարարելու մասին հայտարարությամբ, հայտարարել և հավաստել է, որ բավարարում է «ԹՀՀ-ԳՀԱՊՁԲ-

18/2» ծածկագրով գնանշման հարցման հրավերով սահմանված որակավորման չափանիշների պահանջներին:

- N4 հավելվածով՝ առաջարկվող ապրանքի՝ հրավերով նախատեսված տեխնիկական բնութագրերին համապատասխանության մասին հայտարարությամբ, հայտարարել և հավաստել է, որ «ԹՀՀ-ԳՀԱՊՁԲ-18/2» ծածկագրով գնանշման հարցմանը մասնակցելու նպատակով իր կողմից ներկայացված մասնակցության դիմումում նշված չափաբաժնի (չափաբաժինների) մասով առաջարկվող ապրանքի (ապրանքների) տեխնիկական բնութագրերը համապատասխանում են նույն հրավերի համապատասխան չափաբաժնում (չափաբաժիններում) ապրանքի (ապրանքների) տեխնիկական բնութագրի պահանջներին: Նույն հայտարարությամբ Ընկերությունը պարտավորվել է առաջին տեղն զբաղեցրած մասնակից ճանաչվելու դեպքում «ԹՀՀ-ԳՀԱՊՁԲ-18/2» ծածկագրով գնանշման հարցման հրավերով սահմանված կարգով և ժամկետներում ներկայացնել իր կողմից առաջարկվող ապրանքի (ապրանքների) անվանումը, ապրանքային նշանը, արտադրողը, ծագման երկիրը և տեխնիկական բնութագրերը (ապրանքի ամբողջական նկարագիր):

Հանձնաժողովը 19.02.2018թ. ժամը 09:00 նիստի թիվ 2 արձանագրության 2-րդ մասի՝

- 2-րդ կետով որոշել է ընթացակարգի 1-ին չափաբաժնի մասով առաջին տեղն զբաղեցրած մասնակից ճանաչել «Էլմարկետ» ՍՊԸ-ին:

- 3-րդ կետով որոշել է՝ հիմք ընդունելով «Գնումների գործընթացի կազմակերպման» կարգը հաստատելու մասին ՀՀ կառավարության 04.05.2017թ. N 526-Ն որոշման 43-րդ կետի 4-րդ ենթակետը, ծանուցել առաջին տեղն զբաղեցրած մասնակիցներին՝ առաջարկելով ծանուցումն ստանալու օրվանից երեք աշխատանքային օրվա ընթացքում հրավերով սահմանված էլեկտրոնային փոստի միջոցով ներկայացնել որակավորման չափանիշները հիմնավորող՝ հրավերով նախատեսված փաստաթղթերը:

Նշված փաստաթղթերը ներկայացնելու նպատակով՝ 21.02.2018թ. ոչ ավտոմատ եղանակով, «Էլմարկետ» ՍՊԸ-ն ծանուցվել է:

Հանձնաժողովը 27.02.2018թ. ժամը 10:00-ին կայացած նիստին թիվ 3 արձանագրությանը արձանագրել է, որ 21.02.2018թ. ընթացակարգի 1-ին չափաբաժնի



համար «Էլմարկետ» ՍՊԸ-ն, «Armeps» համակարգի միջոցով ծանուցվել է և առաջարկվել է նույն ծանուցումն ուղարկելու օրվանից երեք աշխատանքային օրվա ընթացքում էլեկտրոնային փոստի միջոցով ներկայացնել որակավորման չափանիշները հիմնավորող՝ Հրավերի 2-րդ մասի 3-րդ բաժնով նախատեսված փաստաթղթերը:

Նույն արձանագրությամբ Հանձնաժողովն արձանագրել է, որ 27.02.2018թ. դրությամբ «Էլմարկետ» ՍՊԸ-ի կողմից ընդհանրապես չի ներկայացվել որակավորման չափանիշները հիմնավորող՝ Հրավերի 2-րդ մասի 3-րդ բաժնով նախատեսված փաստաթղթերը և հիմք ընդունելով «Գնումների մասին» ՀՀ օրենքի 34-րդ հոդվածի 5-րդ, 6-րդ և 7-րդ կետերը, ինչպես նաև «Գնումների գործընթացի կազմակերպման» կարգը հաստատելու մասին ՀՀ կառավարության 04.05.2017թ. N 526-Ն որոշման 43-րդ կետի 4-րդ ենթակետը՝ որոշել է մերժել «Էլմարկետ» ՍՊԸ-ի կողմից ներկայացված հայտը:

«Էլմարկետ» ՍՊԸ-ն 27.02.2018թ. գրությամբ Պատվիրատուին հայտնել է հետևյալը.

«Հարգելի գործընկեր, տեղեկացնում ենք Ձեզ, որ «Թվային Հայաստան» հիմնադրամի կողմից 21.02.2018թ. ներկայացված ծանուցման համաձայն (Գնանշման հարցման ծածկագիրը՝ «ԹՀՀ-ԳՀԱՊՁԲ-18/2») 22.02.2018թ. «Էլմարկետ» ՍՊԸ-ի կողմից ուղարկվել է էլեկտրոնային ստորագրված N6 և N6.1 հավելվածները նշված էլեկտրոնային հասցեին [artur.badalyan@ekeng.am](mailto:artur.badalyan@ekeng.am): Սակայն ինտերնետային կապի խափանման կամ այլ պատճառներով Դուք այս չեք ստացել: Ուստի Ձեզ ենք ներկայացնում էլեկտրոնային նամակի կարճապատկերումը (screenshot) և 22.02.2018թ. դրությամբ էլեկտրոնային ստորագրված N6 և N6.1 հավելվածները:»:

Ընթացակարգի քննության նպատակով տեղի ունեցած նիստի ժամանակ Ընկերության ներկայացուցիչը Բողոքներ քննող անձին հայտնեց, որ «Էլմարկետ» ՍՊԸ-ին սպասարկող «Գլոբալ Ար» ՍՊԸ-ն 26.05.2018թ. գրությամբ հայտնել է, որ 21.02.2018թ.-ից մինչև 23.02.2018թ. ժամանակահատվածում համակարգչային ծրագրային տիրություն առկա է եղել տեխնիկական խնդիր և ինտերնետային կապը խափանվել է: Ուստի խափանված կապի պատճառով պահանջվող փաստաթղթերը սահմանված ժամկետում Պատվիրատուին չեն հասել: Ընկերության ներկայացուցիչը հայտնեց նաև, որ 27.02.2018թ. գրությամբ Պատվիրատուի էլեկտրոնային հասցեին ուղղարկել է Հրավերով սահմանված N6 և N6.1 հավելվածները 22.02.2018թ. դրությամբ էլեկտրոնային

ստորագրված, ինչպես նաև 22.02.2018թ. ուղղարկված էլեկտրոնային նամակի կարճապատկերումը (screenshot):

Միաժամանակ, «Էլմարկետ» ՍՊԸ-ի ներկայացուցիչը Բողոքներ քննող անձին ներկայացրեց «Էլմարկետ» ՍՊԸ-ի և «Գլոբալ Ար» ՍՊԸ-ի միջև 13.01.2017թ. կնքված պայմանագիրը և «Գլոբալ Ար» ՍՊԸ-ի կողմից «Էլմարկետ» ՍՊԸ-ին ուղղված 26.02.2018թ. գրությունը:

«Էլմարկետ» ՍՊԸ-ի և «Գլոբալ Ար» ՍՊԸ-ի միջև 13.01.2017թ. կնքված պայմանագրի, 1.2 կետի համաձայն՝ Կատարողը պարտավորվում է պատշաճ կերպով տարածել ինտերնետը կազմող ցանցերում դոմեյնի անվան և ԱյՓի համարի համապատասխանության աղյուսակը պահպանող համակարգիչներին Պատվիրատուի կողմից տրամադրված դոմեյնային անվանման Ինտերնետում օգտագործման համար անհրաժեշտ տեղեկատվություն՝ Ձոնայի Հրապարակում կամ դոմեյնի անվան գրանցում:

«Գլոբալ Ար» ՍՊԸ-ն 26.02.2018թ. գրությամբ «Էլմարկետ» ՍՊԸ-ին հայտնել է հետևյալը.

«Հայտնում ենք Ձեզ, որ «Գլոբալ Ար» ՍՊԸ-ն ապահովում է «Էլմարկետ» ՍՊԸ-ի դոմեյնի և հոստինգի, ինչպես նաև այլ համակարգչային ծրագրերի սպասարկումը: Հայտնում ենք, որ 21.02.2018թ.-ից մինչև 23.02.2018թ. ժամանակահատվածում համակարգչային ծրագրային տիրություն առկա է եղել տեխնիկական խոտան՝ մասնավորապես MAILSERVER համակարգում: Ուստի հայտնում ենք Ձեզ, որ խափանված կապի պատճառով առկա են եղել նաև թերությունների առաջացում համակարգչային այլ ծրագրերում: Խոտանը ամբողջությամբ վերացվել է 23.02.2018թ.:

Հայցում եմ Ձեր ներողամտությունը պատճառված վնասի համար»:

«Գնումների մասին» ՀՀ օրենքի (այսուհետ՝ նաև Օրենք)՝

• 2-րդ հոդվածի՝ 23-րդ կետի համաձայն՝ գնման գործընթացը գնում կատարելու նպատակով գնումների մասին Հայաստանի Հանրապետության օրենսդրությամբ նախատեսված ընթացակարգերի, իրավունքների և պարտականությունների իրագործմանն ուղղված գործողությունների ամբողջությունն է, ներառյալ գնումների պլանավորումը, գնման առարկայի բնութագրերի հաստատումը, պայմանագրի կատարումը և կառավարումը:



- 6-րդ հոդվածի 1-ին մասի 6-րդ կետի «ա» ենթակետի համաձայն՝ մասնակիցն ընդգրկվում գնումների գործընթացին մասնակցելու իրավունք չունեցող մասնակիցների ցուցակում, եթե խախտել է պայմանագրով նախատեսված կամ գնման գործընթացի շրջանակում ստանձնած պարտավորությունը, որը հանգեցրել է պատվիրատուի կողմից պայմանագրի միակողմանի լուծմանը կամ գնման գործընթացին տվյալ մասնակցի հետագա մասնակցության դադարեցմանը;

- 6-րդ հոդվածի 2-րդ մասի համաձայն՝ գնումների գործընթացին մասնակցելու իրավունքից զրկված մասնակցի վերաբերյալ ունեցած տեղեկությունների հիման վրա լիազորված մարմինը պաշտոնական ընթացակարգ է նախաձեռնում գնումների բողոքարկման խորհրդում՝ առանց վճարի: Տվյալ մասնակցի կարծիքը լսելուց հետո գնումների բողոքարկման խորհուրդը որոշում է կայացնում մասնակցին նույն հոդվածով նախատեսված ցուցակում ընդգրկելու վերաբերյալ: Անձը նշված ցուցակում ընդգրկվում է երկու տարի ժամկետով:

- 34-րդ հոդվածի 1-ին մասի համաձայն՝ հայտերը գնահատվում են հրավերով սահմանված կարգով: Բավարար են գնահատվում հրավերով նախատեսված պայմաններին համապատասխանող հայտերը, հակառակ դեպքում հայտերը գնահատվում են անբավարար և մերժվում են:

- 34-րդ հոդվածի 5-րդ մասի 1-ին կետի համաձայն՝ առաջին և հաջորդաբար տեղերը զբաղեցրած մասնակիցներին որոշելուց հետո հրավերով սահմանված ժամկետում՝ առաջին տեղը զբաղեցրած մասնակիցը հանձնաժողովին է ներկայացնում իր՝ գնումներին մասնակցելու իրավունքը և հրավերով նախատեսված որակավորման չափանիշներին համապատասխանությունը հիմնավորող՝ հրավերով նախատեսված փաստաթղթերը (տեղեկությունները):

- 34-րդ հոդվածի 6-րդ մասի համաձայն՝ հայտը գնահատվում է բավարար, եթե նույն հոդվածի 5-րդ մասի համաձայն ներկայացված տվյալները բավարարում են հրավերով սահմանված պահանջները:

- 34-րդ հոդվածի 7-րդ մասի համաձայն՝ նույն հոդվածի 6-րդ մասի համաձայն՝ գնահատման արդյունքում հայտը անբավարար գնահատվելու դեպքում հանձնաժողովը

փաստաթղթերը ներկայացնելու պահանջ է առաջադրում հաջորդ տեղն զբաղեցրած մասնակցին:

ՀՀ կառավարության 04.05.2017թ. N 526-Ն որոշմամբ հաստատված «Գնումների գործընթացի կազմակերպման» կարգի (այսուհետ՝ Կարգ)՝ 43-րդ կետի 4-րդ ենթակետի համաձայն՝ հայտերի բացման նիստի ավարտին հաջորդող աշխատանքային օրը հանձնաժողովի քարտուղարն էլեկտրոնային եղանակով ծանուցում է առաջին տեղն զբաղեցրած մասնակցին՝ առաջարկելով երեք աշխատանքային օրվա ընթացքում ներկայացնել որակավորման չափանիշները հիմնավորող՝ հրավերով նախատեսված փաստաթղթերը, բացառությամբ նույն կարգով նախատեսված դեպքերի, ապրանքների գնման դեպքում նաև նույն կարգի 32-րդ կետի 1-ին ենթակետի «զ» պարբերությամբ նախատեսված փաստաթուղթը, իսկ բանկային երաշխիքի ձևով ներկայացված հայտի ապահովման բնօրինակը՝ կից գրությամբ: Նույն մասով սահմանված ժամկետում փաստաթղթեր ընդհանրապես չներկայացվելու դեպքում հանձնաժողովը հայտերի գնահատման նիստում մերժում է առաջին տեղն զբաղեցրած մասնակցի հայտը և փաստաթղթեր ներկայացնելու պահանջ է ներկայացնում հաջորդաբար տեղը զբաղեցրած մասնակցին:

Հրավերի 8.13 կետի 4-րդ ենթակետի համաձայն՝ Հանձնաժողովի քարտուղարը հայտերի բացման նիստի ավարտին հաջորդող աշխատանքային օրը՝ համակարգի միջոցով առաջին տեղը զբաղեցրած մասնակցին ուղարկում է ծանուցում, առաջարկելով ծանուցումն ուղարկելու օրվանից երեք աշխատանքային օրվա ընթացքում էլեկտրոնային փոստի միջոցով ներկայացնել որակավորման չափանիշները հիմնավորող՝ սույն հրավերի 2-րդ մասի 3-րդ բաժնով նախատեսված փաստաթղթերն ու առաջարկված ապրանքի (ապրանքների) ամբողջական նկարագիրը: Նույն ենթակետով սահմանված ժամկետում փաստաթղթեր ընդհանրապես չներկայացվելու դեպքում հանձնաժողովը հայտերի գնահատման նիստում մերժում է առաջին տեղը զբաղեցրած մասնակցի հայտը և նույն նիստում հանձնաժողովը առաջին տեղը զբաղեցրած մասնակցի է ճանաչում հաջորդաբար տեղ զբաղեցրած մասնակցին՝ կիրառելով նույն հրավերի 1-ին մասի 8.13-ից 8.21-րդ կետերով սահմանված ընթացակարգը:



Բողոքներ քննող անձն արձանագրում է, որ Հանձնաժողովի կողմից համակարգի միջոցով «Էլմարկետ» ՍՊԸ-ին ուղարկվել է Ընթացակարգի հրավերով սահմանված ժամկետում որակավորման պահանջներին համապատասխանությունը հիմնավորող փաստթղթերը ներկայացնելու վերաբերյալ համապատասխան ծանուցումը, սակայն պահանջվող փաստթղթերը սահմանված ժամկետում Պատվիրատուի կողմից չեն ստացվել:

Բողոքներ քննող անձն արձանագրում է նաև, որ «Էլմարկետ» ՍՊԸ-ի կողմից Պատվիրատուի էլեկտրոնային փոստին 22.02.2018թ. Ընթացակարգի հրավերով նախատեսված որակավորման պահանջներին համապատասխանությունը հիմնավորող փաստթղթերը ներկայացնելու վերաբերյալ ուղարկված նամակը Պատվիրատուին չհասնելու պատճառը հանդիսացել է Ընկերության դոմեյնի և հոստինգի, ինչպես նաև այլ համակարգչային ծրագրերի սպասարկման ինտերնետային կապի խափանման հետ:

Հիմք ընդունելով վերոգրյալը՝ Բողոքներ քննող անձը գտնում է, որ «Էլմարկետ» ՍՊԸ-ին գնումների գործընթացին մասնակցելու իրավունք չունեցող մասնակիցների ցուցակում ներառելու հիմքեր առկա չեն:

Ելնելով վերոգրյալից և ղեկավարվելով «Գնումների մասին» ՀՀ օրենքի 6-րդ հոդվածի 2-րդ մասով, 50-րդ հոդվածի 7-րդ մասի 2-րդ կետով՝ ՀՀ գնումների հետ կապված բողոքներ քննող անձը

### Ո Ր Ո Շ Ե Ց

ՀՀ ֆինանսների նախարարության կողմից 11.04.2017թ. թիվ 03/26-3/6765-18 գրությամբ «Էլմարկետ» ՍՊԸ-ին (ՀՎՀՀ 00112776) գնումների գործընթացին մասնակցելու իրավունք չունեցող մասնակիցների ցուցակում ներառելու նպատակով նախաձեռնված ընթացակարգը մերժել:

ՀՀ գնումների հետ կապված բողոքներ քննող անձի ընդունած որոշումն իրավապարտադիր է, որը կարող է փոփոխվել կամ վերացվել, այդ թվում՝ մասնակի, միայն դատարանի կողմից:

ՀՀ գնումների հետ կապված բողոքներ քննող անձի ընդունած որոշումն ուժի մեջ է մտնում այն տեղեկագրում հրապարակելուն հաջորդող օրը:

ՀՀ գնումների հետ կապված  
բողոքներ քննող անձ՝



ԷՄԻԼ ՍԱՐԳՍՅԱՆ